

օրէնսդրութիւն, ենթակայ են պարսիկ խաների կամայականութիւններին, որոնք բացի օրինական հարկից առնում են նաև ապօրինի հարկեր, այսպէս՝ 144 բեռ եօնջա, 100 հաւ, 1000 հաւկիթ, 6 ոչխար, 100 բեռ յարդ, 100 լիար վառելիք (աթար), բացի այդ գիւղացիներն այս տարի (1918 թ.) պահում էին Մամթաղի աղալի 100 ոչխարները:

Այսպիսի պայմաններում հասկանալի է սիրելիս, խեղճ գիւղացիութեան դրութիւնը. շնորհիւ այդ հարստահարութիւնների՝ նրանք օրրստօրէ տնտեսապէս քայքայուում են և դիմում դէպի աղքատութիւն:

Հողը հերկում են արօրով: Ցանում են նոյն հացաբոյսերն և այլ ցանովի խոտեր:

Գիւղն ունի մի եկեղեցի՝ Ս. Գէորգ անունով և մի խալիֆայական գպրոց, որը գտնւում է եկեղեցու վերի յարկում. դա փոքրիկ մի սենեակ է, ուր գետնի վրայ, գլխարկները գլուխներին՝ ծալապատիկ նստած են մօտ 30 աշակերտներ և որոնք մի տիրացւի «ուսուցչութեամբ» կարդում են կրօն, մայրենի լեզու, ժամագիրք և Նոր-Կտակարան առանց հասկանալու նրանց բովանդակութիւնը: Գիւղացիների մեծամասնութիւնը տգէտ է:

Գիւղում կայ նաև մի ջրաղաց:

Այս գիւղից դէպի արևմուտք, 20 քայլ հեռաւորութեան վրայ գտնւում է առիւծանման մի սպիտակ քար: Ամուլ կանայք ուխտի են գալիս այստեղ, քարի անցքով երեք անգամ անցնում, որպէսզի երեխայ ունենան . . .

№	Կ Ա Ր Գ Ե Ր	Շուուչ
1	Աղքատ	100
2	Չունևոր	88
3	Միջակ	300
4	Ունևոր	100
5	Հարուստ	100
Ընդամենը		688